

Karatas ezektsa bo ziwatahaka

Taparaka Deus Sudeutsa zuba nisiwatawy iwaze hi ityryktsa niyziknaha, isopykwytsa nisispirikpoko, sihyrytsa sipiakzyzykyhytsa. Iwa ityryktsa ziwatawy. Sidisahawy kino niwatihi ikaty hi ziknatahadisahakanaha sibo zuba ziknakara. Aiba Sesus Kiristu izumuze mysapyzekenihyrikosokda iwaze asaktsa Sesus humo sispirikporētsa myziknaha zeka Deus tuk tahawahi mynapykyryknaha. Sesus Kiristu tazo bo ziksizoze ituk zinymyrykynahatsa paikpa tisapyrēna ty niharapespirikpokonaha. Sizubarētsa Sesus humo sispirikporētsa, Sudeutsabyitsa tuze iwatsahi Sudeutsa sopykwy batu aha tahyrytsa ty batu isty piakzyzyk. Pauro Karatas niparakze wastuhu Sudeutsa Sesus tuktsa pe niaha. — Ahahyrytsa piak tysizyzyktaha anahi Deus myzihikik — nikaranaha. Anahi Pauro ziwabyze sibo ziwatahaka ispe niy:

— Tsimyinaha tahahyrytsa ty batu isty piakzyzyk, Sesus humo ahaspirikporētsa tu zeka Deus harere bo zuba ma tsimykaranaha anahi Deus myzihikik — niy. Iwa Deus Pauro ziapewywy iwaze aparakbaha tanymyryky.

Tapara aparakbaha bo mytsaty mykara.

¹⁻² Uta Pauro. Ikiahatsa tsinakypykbanahaze Deus harere tsipiwabynaha ahabo iwatahaka. Deus zikwatawy. Kytsa humo ka batu. Deus myzo hi zikwatawy iykzoho mozik. Sesus

Kiristu humo kino niwatihi zikwatawy atahi Deus zihyrikizipowy. Katukytsa kabaze modyhydyhykynahatsa, asa harere ahabo piwatahakanaha. Tynakypyknahatsa Karatas eze tsimaha. Tsinazuzukbanahaze Sesus harere tsipiwabynaha.

³ Ahatsyhyryze Deus bo mopamykysoko:

— O Deus myzo Sesus tuktsa Karatas eze ktsa tysisapywyky. O Sesus Kiristu mypehakatsa tysi-akusukniwyky — my. Iwa ahatsyhyryze Deus bo mopamykysoko.

⁴ Kiristu mysapyzekenahaze hyŷ zuba niy, iwatahi mysapybyitsa tsikykarana ihumo Deus ninyokzohik. Kiristu nihyrikosokdaze Deus nawa hi nizihikik. Iwaze mymytsumuēhĩ. Abaka hawa kytsa sisopyk batu tsimykarana, katsaktsa Kiristu humo meky watu tsimoziknaha.

⁵ Iwatsahi Deus bo tynapamykysokonahaktsa! — O Deus ikia zuba wasani tsimykara. Ikia zuba tsamysapyrēta — tsimaha. Iwa hi tsimynakaranaha.

Deus wasania ty zuba my.

⁶ Kyze tubabatu Deus zahawatawy. Sesus Kiristu myzahasapywyky. Asiba Deus tsierek tsihikiknaha ana hi iwaby. Hawa tsimykarana batu isapy my, ana humo hi batu kahyrinymyry kapetu kasopyk:

— Nawa ha ty Karatas eze ktsa soho piwabyky wasani ja. Batu kanyhy — my. Usta maku mekywaha humo pahahyrinymyryky anahumo hi yhy tsimykarana. Atahi:

— Kaharere wasani my — mybarapetu nikara. Ikiahatsa iharere bo yhỹ tsimykaranaha zeka kaharere bo batu hỹ tsimaha. Kaharere humo tsimyspiriktsokdabanaha ana humo hi kamyt-satyharêta mykara. ⁷ Tohi harere humo batu mysopyksapy my. Deus harere ana zuba wasani my. Simyknianikitsa ustsaharere ahabo motsasokonaha iwa tihi:

— Myharere wasani — mybarapetu mykaranaha. Asahi Deus wasania ty hi myzapywak tsihikiknaha hỹ. Iwaze Deus wasania ty Sesus soho zisapybyrikinaha. ⁸ Aty zeka Deus wasania ty mekywaha tu pahahyrinymyry, iharere mysapybyri iwaze iharere meky watu my. Iwaze Deus ispe:

— O ikiahatsa batu ahamysapy tsimaha. Sinini ykarawy bo pahapehahik — iwa Deus motsasoko zeka wasani my. Uta, katukytsa, bijoikpe iknykta iwatsa Deus wasania ty mekywahatu pahahyrinymyry zeka Deus mysininiwy bo wasani mytsaty mykara. ⁹ Tubabatu tapehawy iktsaso. Abaka ahabo atsatu motsasokozo. Amakata ahabo mozumu zeka meky harere pahahyrinymyryky Deus hi:

— O atakta batu imysapy my. Sinini ykarawy bo pipehahik — niy. Deus wasania ty katsa botu ahabo tsiktsasokonaha ana bo hi zuba hỹ tsimykaranaha. ¹⁰ Iwaze kino Deus wasania ty motsasokoze kytsa hi — O atakta mykparawy — iwa batu mozihihik. Deus kape my zeka:

— O atakta tsimysapyrêta — my ana hi mozihihik. Deus kasoho ty motsasoziuku zeka kakurêta hỹ. Myzubaha kasoho

motsasoziukunaha zeka anahi mozihihikik iwa zeka batu Sesus tsumuēhĩtsa babata ziky.

Hawa niyta Pauro Deus ykzoho niyzik.

¹¹ Kyze — O katukytsa Deus harere ahabo motsasoko kytsa harere ba ziktsaso. Ataharere bo ka kytsa batu mytsaty zikaha. ¹² Ataharere ty ka kytsa batu katy hyrinymyry. Sesus Kiristu hi zikyrinymyry hỹ.

¹³ Kasoho botu tsiwabynaha hỹ. Utakta Sudeu my. Iwatahi Moises harere bo zuba hyỹ ziknakara. Sesus harere humo hyỹ nikaranahatsa iksisukyryky. Asahi inauzuzukbanahaze Sesus harere ziwabykynaha asahi ziknasisukyryikik. Iwa Sesus harere bo ka ja ba hỹ zikaha mytsaty ahabyitatu ikykara. ¹⁴ Taparaktsa myzotsa harere bo pykyhytu hyỹ ikykara. Aparakbaha mysopyk humo zuba yhyỹ ziknakara. Katsa zuba myhyrinymyrētsa mytsaty ahabyita tu iky, iwatahi nanabyi sisopyk humo hyỹ ikykara.

¹⁵ Deus hi ziksapywy. Kapurukbyizetu Deus zikwatawy. Iwaze ikypykze Deus wasania ty ustsas kytsa bo zikpeha. Kakzohota tu Deus wasania ty ustsas kytsa bo motsasoko. ¹⁶ Deus tatse kabo ziwatawy iwaze Deus tse zikspirikpoziuku. Iwatahi aparakbaha Sudeutsabyitsa bo Sesus soho iktsasoko. Iwaze aparakbaha bo batu tyso: “O amy ty Sesus soho mysihyrinymyry” — my. Iwa batu tyso. ¹⁷ Damasko eze tuze batu Serusarēhe bo zuk. Batu Sesus ykzohotsa bo kozore. Atazuba Arabija imyra zubaha bo inakozore. Aiba tohi eze zuba Damasko bo ikziksizo. ¹⁸ Nawa harakykbyi niytyk tseheze Serusarēhe bo ikparak. Peduru

bo ikumu, ituk ikapykyrykspyk mytsyhyrytsa wa ikuruze iwaze Damasko bo iksizo. ¹⁹ Serusarêhe eze tuze, usts Sesus ykzohotsa ty batu isty ny. Mypehakatsa Sesus tsy bo zuba ikozo. Tsiaku inarokota.

²⁰ Nawa ha ty ahabo piwatahaka wasapehe mykara. Deus okzeka piwatahaka batu kamyspihikbata.

²¹ Kyze Sirija bo ikukuru. Iwaze Sirisia bo ikukuru. ²² Kytsa Sesus tuktsa Sudeu ezektsa batu katyny niaha. Asaktsa batu katy nyhabyitsa maha. ²³ Iwaze zuba kasoho ziwabynaha:

— O atakta tubabatu katsa nimysukyryikik abaka Sesus harere bo hyĩ isopyk ihumo tispirikporêta niyzik. Atahi myzubaha bo motsasoko hawa Sesus harere bo hyĩ mykaranahaze hawa iharere bo zuba yhyĩ mykaranaha iwa motsasoko — mykaranaha. Iwa kasoho ziwabykynaha.

²⁴ Iwaze Sesus tuktsa Deus bo mosakibazikiknaha:

— O Deus katsaktsa mykurêtsa. Hawa tsimy kara Pauro humo mykurêtsa tsimoziknaha — nikaranaha.

2

Pauro usts sakzohotsa tuk my.

¹⁻² — Nawa niytyk tseheze kîsî ziharamuze Serusarêhe bo ikzikisizo. Deus kape niy: “Ikiakta Serusarêhe bokta!” — niy.

Hyĩ iky. Iwaze Serusarêhe bo ikparakzo. Baranabe katuk niukuru. Katsa Titu pe tsikaha.

— Iki tihikta! — tsikaha.

Hyÿ niy. Titu Sudeubyita. Iwaze katsa Serusarêhe bo tsikukurunaha. Tsikumu-nahaze myspirikpokotsa bo tsikaha. Katsa myspirikpokotsa bo zuba tsiktsasokon-aha. Sudeutsabyitsa iksihrinymyryky myspirikpokotsa bo iktsaso. Kaharere Sesus soho Sudeutsabyitsa bo iktsasoikik iwa sibo iktsasoko. Uta kapetu kasopyk:

— O kaharere Sesus soho bo yhyÿ zikaha byizeka hawa ty iktsasoko na haka mohokda — mytsaty ikykara. Iwatahi kaharere ty sibo iktsaso. ³ Hawa niy tisapyrêna. Mytukta Titu Sudeubyita batu ipe niaha:

— O tsipiakzykikta! — maha. Iwa batu tyso. ⁴ Kytsa asahi Sesus harere bo batu hyÿ zikaha iwatsahi sispirikpoziubyitsa tu:

— Tsipiakzykik zeka wasani my — nikaranaha. Asaktsa sisukparatsitsa. Kytsa papatu nipupunaha. Batu Sesus tuktsabyitsa maha. Katsaktsa Sesus tuk atsatu mytsaty tsimykaranaha ana hi nizokparakanaha. Sesus sopyk ty zuba tsimykaranaha iwatsahi mykurêtsa hyÿ. Asaktsa pykyhytu Moises sopyk bo zuba hyÿ mykaranaha katsaktsa nawa tihi ana hi nizihikiknaha. ⁵ Utakta siharere bo hyÿbiri ziknakara. Katsahi:

— Deus harere ty Sesus soho wasani zuba tsimaha. Iharere bo zuba hyÿ tsimykaranaha — tsikaha. Iwaze siharere batu mywabyhy.

⁶ Asaktsa sihumo kytsa sizubarêtsa myspirikpokotsa watsa mykaranaha. Asa harere ezytyk ty batu tyso. Deus okezeka kytsa batu abazubatsa maha ihumo myzubaha astsatu

maha. Iwa utakta niwatihi mytsaty mykara.
⁷Deus wasania ty Sesus soho nitsasoikik ana soho hi:

— Ikia Deus wasania ty Sudeutsabyitsa bo motsasoko atsawatu Peduru Deus wasania ty Sudeutsa bo motsasoko. ⁸Deus hi ikia zapehahik iakzohota hi Sudeutsabyitsa bo, izikwy atuk mynapykyryk. Astatu Deus Peduru zipehahik iakzohota hi Sudeutsa bo izikwy ituk mynapykyryk. Abaka ana humo kino tsipinymyrykynaha — niaha. ⁹Iwaze Tsiaku, Peduru, Suão iwatsa sispirikpokotsitsa Sesus tuktsa tuk mype niaha:

— O mytukytsa Deus hi Sudeutsabyitsa bo pahapehahik ana hi ahyriziktsokzawy izikwy ty ahabo nyny my. Tisapyrēna tsimaha — niaha. Iwatsahi mymykusukniwykynaha. Mytsyhyrypetsa humo paik niaha iwaze siharerezi-uwytsa niyziknaha. Kyze mype niaha:

— O ikiahatsa mytuktsa babatsa. Ikia Baranabe kino niwatihi Sudeutsabyitsa boktsa! Utakta katyryktsa bo my. Iwa wasani my. ¹⁰Tsimykurunahaze Sudeutsabyitsa bo katyryktsa sinamybyitsa bo ahamytsatyhu ja ispiriktsokda spiriktsoda byijataha! — niy.

— Yhỹ. Sinamybyitsa humo mymypokzit-sirētsa — tsikaha. Botu sinamybyitsa tsiksit-sumuēhĩkĩnaha.

Pauro Peduru Sesus tuktsa okze zipehaka.

¹¹Kyze Peduru Ātiokia bo inakozoreze Sesus tuktsa okze tu zipehaka. Imysapybyita hi zibetsakak.
¹²Tapara Peduru zumuze Sudeutsabyitsa asahi Sesus tuktsa maha situk tahadisahakanaha. Kyze

Tsiaku itukytsa Ātiokia bo nisipehahik. Peduru sibo nikozoze tisikpybyrēta niyzik. Tapetu nikara:

— O asaktsa Tsiaku tuktsa asahi Sesus harere bo hỹ nikaranahaze sispirikporētsa. Sudeutsabyitsa mysipiakzyzykik tsihikiknaha iwaze kahumo siharerewabymybarētsa, iwatahi Sudeutsabyitsa tuk ba zikdisahazo metutu mozikdisahaka iky — niy.

¹³ Iwaze Sudeutsa Sesus harere bo hỹ nikaranaha iwatsahi ihumo sispirikporētsa Peduru humo sisikpybyrētsa niyziknaha. Sispirikporētsa nikaranaha iwatsa tu nawa ha ty batu simysapy nikaranaha. Peduru watsa nikaranaha. Hawa nikaranaha Baranabe kino niwatihi siwatu nikara.

¹⁴ Iwatahi Peduru ipehaka, Sesus harere humo batu h̃ niy iwatahi ibetsakak. Sesus tuktsa in-azuzukbanahaze ibetsakak. Ipe iky:

— Tsiwabytoktokta! Ikia Sudeu tsimy. Hawa skaraba Sudeutsabyitsa sopyk ty mykara atsatu asopyk tsimy. Sudeutsa wata batu tsimykara. Iwatahi myzubaha Sudeutsa watsa sisopyk moz-ihikik. Ana kino batu imysapy my. Asopyksapy byihuja — iky.

Sudeutsa, Sudeutsabyitsa niwatihi Sesus harere bo hỹ mykaranaha asahi zuba Deus bo mysiokty-hryk h̃.

¹⁵ Kyze katsaktsa Sudeutsa tsimaha. Myzotsa Sudeutsa niaha. Utsa kytsa simysapybyitsa nikaranaha iwa Sētios mekywatsa soho nisinaropykyknaha. ¹⁶ Iwatsa tu katsa Moises harere ibyky bo zuba yh̃ tsimykaranahaze. Deus batu mytyso:

— O asaktsa simysapyrëtsa maha — iwa batu tyso. Katsa Sesus Kiristu harere bo zuba hyÿ tsimykarannahaze Deus mysoho tihi:

— O asaktsa simysapyrëtsa maha — my.

Katsa Sesus harere bo yhyÿ tsimykarannaha humo Deus okzeka mymysapyrëtsa tsimoziknaha. Batu aty tohi Moises harere ibyky bo yhyÿ my zeka tsimysapyrëta mozik. Deus tatuk hi mymyoktyhyryk iwatsahi mysapyrëtsa tsimaha. Moises harere ibyky bo hyÿ tsimykarannaha zeka Deus okzeka batu mysapy tsimaha, ana humo kino batu Deus bo mymyoktyhyryk. ¹⁷ Deus tatuk mymyoktyhyryk iwatsahi Moises harere ibyky tsimoewynaha. Sesus Kiristu harere bo zuba yhyÿ tsimykarannaha. Iwaze aparakbaha mype:

— O ikiahatsa Sudeutsabyitsa watsa tsimoziknaha. Ahamysapybyitsa tsimykarannaha — mybarapetu mykarannaha. Iwa zeka Sesus Kiristu humo ahamysapybyitsa tsimykarannaha. Batu ba. Sesus Kiristu humo batu tymyi. ¹⁸ Kapetu kasopyk zeka:

— O Moises harere ibyky humo yhyÿ mykarazo iwaze kasapybyita mykara zeka mohokda — my. Utatu pikspihikbataka. Iwa mytsaty mykara zeka iwatahi Moises harere ibyky batu hyÿ mykara. Sizubarëtsa kasoho tihi:

— O atakta batu imysapy my — mykarannaha. ¹⁹ Moises harere humo inymyrytohi iwa zeka iharere bo batu hyÿ mykara. Iwatahi batu kasapy mozik iharere bo yhyÿ mykara. Iwatahi Moises harere ibyky zimoewy. Abaka Kiristu harere bo zuba hyÿ mykara isopyk mykara. Kiristu kasapyzeky iharapatawyhyta humo

nihyrikosokda. Kasapyzeky nihyrikosokdaze kasopykwy nepykba, abaka ituk mynapykyryk ihumo zuba kamysapyrëta mozik.

²⁰ Utakta Sesus zuba mozihikik mykara, atahi kasapyzeky nihyrikosokda iwatahi kahumo izihik bara ty ka pimoewy mykara. Kiristu hyrikoso katuk mynapykyryk ihumo zuba mozuruku, iwatahi abaka kasopykwy pimoewy. Abaka Deus tse humo kaspirikporëta. Atahi namykse nikara ana humo hi utakta batu kawahi zikara. Sesus kapokzi tsimypokzitsiarëta iwatahi ituk mynapykyryk. ²¹ Deus mymysapywyky ana humo hi Kiristu mysapyzeky nihyrikosokda. Iwatahi kakurëta. Deus mype my zeka:

— O ikiahatsa ahamysapyrëtsa Moises harere ibyky humo tsimykaranaha — Iwa batu tyso. Iwa niy zeka hawa hâta sa Kiristu nihyrikosokda. Nawa batu ba. Kiristu harere bo hyÿ ikykara ihumo zuba kaspirikporëta iwaze Deus tihi:

— Ikia tsamysapyrëta. Kiristu katse asapyzeky nihyrikosokda ana humo hi tsamysapyrëta — my.

3

Ikiahatsa Moises Deus harere ibyky naha bo ja yhyÿ tsimaha. Deus wasania ty bo ja yhyÿ tsimaha. Na waha sa tsimyzihikiknaha.

¹ — O Karatas ezektsa ahakedepyktsa zuba. Aty sa zahaspihikbataka. Ahape mybarapetu nikaranaha. Hawa kytsa Sesus Kiristu iharapatawyhyta humo zihyризikiknaha iwa zibezenaha, ana kino botu ahabo iktsaso. ² Ahabo motsaso zeka my:

“Hawa sa Deus hyrikoso ahatuk mynapykyryk. Ikiahatsa Moises harere ibyky bo yhỹ tsikykarannahatsa ja Deus hyrikoso ahatuk napykyryk my. Ikiahatsa tihi:

‘Batu ba.’ Katsaktsa Sesus Kiristu harere bo hỹ tsikykarannahaze iharere humo myspirikporētsa, ana humo hi Deus hyrikoso mytuk mynapykyryk” — tsimaha.

³ — O ikiahatsa ahakedepyktsa. Sesus harere bo hỹ tsikykarannahaze Deus hyrikoso ahatuk mynapykyryk. Abaka Deus hyrikoso tsiperek tsihikiknaha. Iwatsahi ahape tu tsimykarannaha: “Abaka myhumo zuba tsimyzurukunaha tsimaha” — my. Batu wasani my. ⁴ Hawa ahabo nikara ana bo hi batu mytsaty tsimykarannaha Deus hyrikoso ahatuk mynapykyryk iwatsahi ihumo arek arek byitaha! ⁵ Deus hi tahyrikoso ahabo zipaha iwatahi ahatuk mynapykyk. Ihyrikoso humo hawaha kytsa batu zikaha atahi ahatuk ziknakara. Iwa humo nikara. Sesus harere bo hỹ tsikykarannahaze ahatuk nikara. Iwa hỹ. Moises harere ibyky bo yhỹ tsikykarannaha zeka Deus hyrikoso batu ahatuk mynapykyryk.

⁶ Aba Abarão soho bo mytsaty tahaktsa! Deus papeu humo isoho botu ziwataha:

— O atakta Deus humo tispirikporēta iwaze Deus tihi: “O Abarão kaharere bo hỹ nikara kahumo tispirikporēta tsimysapyrēta niyzik. Isapybyikia ty nikara nisiokzohik ikspiritsokdatawy” — niy. Iwa Deus papeu humo botu ziwatahaka niy.

⁷ Iwatsahi asaktsa Sesus harere bo hỹ mykaranaha iwatsahi Abarão watsa maha. Sispirikporêtsa Abarão tsekokatsa babatsa maha sisoho humo tsimaha. ⁸ Tubabatu taparaktsa botu Deus papeu humo ziwatahaba Sudeutsabyitsa soho botu ziwatahakanaha. Asaktsa Deus harere bo hỹ mykaranaha iwatsahi ihumo sispirikporêtsa maha. Iwaze Deus tihi:

— O asaktsa Sudeutsabyitsa kahumo sispirikporêtsa iwaze ispe: “O ikiahatsa ahamysapyrêtsa tsimoziknaha” — my.

Iwa Deus papeu humo taparaktsa botu ziwatahakanaha. Hawa Deus wasania ty Abarão bo nitsasoko aibani zuba atsatu mykara. Iwaze nawa ha ty botu nitsasoko atsatu wasani my ana kino aparakbaha ziwatahakanaha. Deus tihi:

— O Abarão ikia kahumo tsaspirikporêta iwaze mybarawy sizubarêtsa ahumo mysisapywyky. Myzubaha nanabyitaba ahumo mysisapywyky — niy.

Iwa taparaktsa Deus papeu humo ziwatahakanaha. ⁹ Iwatahi Abarão Deus harere bo hỹ nikara iwatahi ihumo tispirikporêta iwaze Deus zisapywyky. Aty Deus harere bo hỹ mykara ihumo mospirikpo zeka ibo pisapywyky. Abarão wata nikara. Iwa myh̃.

¹⁰ Iwaze aty zeka:

— O utakta Moises harere ibyky bo yh̃ my zeka iwaze kamysapyrêta mozik — my. Mytsaty ahabyita mykara atakta Deus isoho tihi:

— Atakta batu isapy my — my. Taparaktsa Deus papeu humo ziwatahakanahaze:

— Aty zeka Moises harere bo yhy mykara iwaze iharere bo estuba zuba batu hy my iwaze Deus ipe my: “Ikia batu amysapy” my — iwa Deus ziwatahaka. ¹¹ Taparaktsa Deus papeu humo ziwatahakanaha:

— Ata zuba Deus harere bo hy mykara ihumo mospirikpoko ata soho Deus hi “O wasani tsimozik” my iwa ziwatahakanaha. Batu aty tohi Moises harere ibyky tsizubarēna humo hy mykara, anatyhi batu zikaha. Ana humo kino myhyrinyrētsa. ¹² Aty zeka estuba Moises harere ibyky bo hy my zeka batu atsa botu Deus harere bo hy mykara, atakta ihumo batu ispirikpo. Aty Deus humo tspirikporēta tu meky watu niyzik. Aty Moises harere ibyky bo yhy mykara atahi iharere bo zuba mykara hy. Aty Deus harere bo yhy mykara iharere humo mospirikpoko — my. Ana kino meky watu mozik. Iwa my.

¹³ Tubabatu Deus papeu humo:

— Aty kytsa iharapatawyhyta humo pibezenaha atakta tamysapybyizikyty zibezenaha. Iwatsahi pibezenaha zeka wasani my — iwa ziwatahakanaha. Katsa niwatihi. Mysapybyitsa tsikykaranaha Kiristu hi mysapyzeken nihyrikosokda. ¹⁴ Atahi kytsa iharapatawyhyta humo zihyrikiziknaha iwatahi mysapyzeken nihyrikosokda. Nihyrikosokdaze mysapybyikitsa tsikykaranaha ihumo Deus mymyokzohik. Deus hi:

— Ikiahatsa kaokzeka tsahamysapyrētsa — my. Tubabatu Abarão Deus harere bo hy ziknakara ihumo nspirikpokoze Deus isoho tihi:

— O ikia tsamysapyrêta — niy. Katsaktsa Abarão watsa tsimaha. Deus harere bo hyĩ tsimykaranaha ihumo tsimyspirikponaha iwaze Deus hyrikoso mytuk mynapykyryk. Iwahu kytsa Sudeutsabyitsa iharere bo hyĩ mykaranaha zeka ihumo sispirikporêtsa moziknaha. Deus hyrikoso sibo zipaha, ihyrikoso situk mynapykyryk. Iwa myhĩ.

Moises Deus harere taparaky nitsasoko. Hawa Deus harere ty wasani mykara.

¹⁵ — O katukytsa hawa tsimyzurukunaha humo motsasoko. Kytsa petoktsa astsatu mozihikiknaha anasoho papeu humo piwatahakanaha. Zikspiriktsokdanaha bara ty hi petoktsa naro ziwatahakanaha. Iwaze batu aty tohi papeu humo ba zimyĩ. Estuba zikino batu arek ziky. Utsa harere papeu humo piwatahaka batu ziky. Hawa ziwatahakanaha anatyza mykaranaha.

¹⁶ Iwata tubabatu Deus Abarão bo nitsasoko. “O ikia pasapywyky. Estuba zubata atsekoka iknykta ibo pisapywyky” nikara. Deus watahaha ty batu tyso atsekokatsa sizubarêtsa bo mysisapywyky iwatahaha tihi estuba zuba atsekoka iknykta ibo pisapywyky — niy. Abaka Kiristu soho humo myhyrinymyrêtsa hĩ.

¹⁷ Nawa ha ty motsasoko pahahyrynymyry. Tubabatu Deus Abarão bo nitsasoko. Ipe niy:

— O ikia pasapywyky. Kaharere humo yhĩ tsimy hĩ — niy. Iwaze kwatero sêtos terĩta niytyk tseheze Deus Moises bo iharere nitsasoko. Nawa ha ty Deus Abarão pe wasani my. Nawa ha ty Deus Moises pe wasani my. Petoktsa hatsa bo nitsasoko. Tapara Deus Abarão pe niy:

— O ikia pasapywyky — niy. Iwaze usta harere Moises bo nitsasoko taparaky harere batu meky watu ana kino tapara tu ituk nitsasoko.

¹⁸ Iwatsahi hawa Deus mymysapywy tsihikik iharere humo zuba hyỹ tsimykaranaha. Katsa Moises harere ibyky bo yhyĩ tsimaha zeka Deus isapyrēnikia ty batu mybo nyny my. Deus isapyrēnikia ty Abarão bo nyny niy. Amy humo niy. Iharere humo ipe niy iwatahi isapyrēnikia ty ibo nyny niyhy.

¹⁹ Iwaze kytsa mytsaty mykaranaha. Amo skaraba Moises harere ibyky nitsasoko. Moises harere puẽtsik ana hi Deus botu Abarão pe niy nimyhyrinymyryky, mysapybyitsa tsikykaranaha nimywatawyky. Abarão tsekoka Kiristu batu isukmo taziwazy iwaze Moises harere nitsasoko ana bo hi yhyĩ tsimykaranaha. Kiristu izumuze Moises sopyk tsmoewynaha. Deus bijoikpe iknyktsa inasipeha iharere nitsasoko Moises bo niaha. Inasiknahaze nitsasokonaha maku estuba zubata bo niaha. Iwaze zikiehe atakta Moises myzubaha bo atsawatu nitsasoko. ²⁰ Deus Abarão pe niy ibo zuba nitsasoko. Bijoi kpe iknyktsa bo batu tyso. Utsa kytsa bo batu tyso. Abarão bo zuba nitsasoko hyỹ.

Amy sa Moises Deus harere taparaky nitsaso wasani niy.

²¹ Kyze kytsa tahapetu sisopyk:

— O Moises Deus iwatahaka zika Deus harere meky watu ja. Katsa Deus tuk mywahi tsinapykyryknaha Moises watahaha humo ja ana

humo hi tsimykaranaha — maha. Batu ba. Moises watahaha bo hyĩ tsimahaze batu mysapy tsimoziknaha. Iwa hĩ. ²² Deus watahaha tihi:

— Aparakbaha mybarawy ezeiksa imysapybara katsa mytuk. Asaksa Deus humo sispirikporĩtsa amy ty Deus botu nitsaso isapyrĩnikia ty sibo nyny mynakara — niy.

²³ Tapara Moises harere ibyky bo yhy nikaranaha. Sihurukutsa watsa asahi ba zikwaknaha isopykwy batu zikaha. Bykyze Sesus harere bo hyĩ mykaranaha iwaze ihumo sispirikporĩtsa moziknaha. ²⁴ Iwatahi Moises harere ibyky myhyrinymyrytsa wata my. Nawa ha ty batu isapy nymyhyrinymyry. Isopykwy humo kino mysapybyitsa tsikykaranaha nymyhyrinymyryky iwaze Kiristu izumuze katsaksa iharere bo hyĩ tsimykaranaha ihumo myspirikporĩtsa tsimoziknaha ana humo hi mymysapyrĩtsa tsimoziknaha. ²⁵ Abaka Kiristu harere bo hyĩ tsimykaranaha ihumo myspirikporĩtsa Deus okzeka mymysapyrĩtsa iwatsahi Moises harere ibyky tsmoewynaha.

²⁶ Ikiahatsa Kiristu Sesus harere bo zuba hyĩ tsimykaranaha iwatsahi ihumo ahaspirikporĩtsa iwatsahi Deus hyrytsa tsimoziknaha. ²⁷ Sesus humo ahaspirikporĩtsa kytsa zahaharasusuhiknaha niaha. Ikiahatsa Kiristu watsa puĩtsik tsimyzihihiknaha. ²⁸ Iwatsahi myzubarĩtsa Sesus tuktsa maha, Deus okzeka Sudeutsa Sudeutsabyitsa watsa my. Kytsa tarabaja batu okyrysaro humo sinamyrĩtsa watsa my. Maku kino wytykyryk wahaza my. Deus okzeka atsaesubaha maha. Sesus Kiristu humo

sispirikporētsa Deus okzeka atsabarētsa maha.
²⁹ Iwatsahi Kiristu harere bo hỹ tsimykaranaha
ihumo myspirikporētsa katsa Abarão tsekokatsa
watsa. Katsakta Abarão sapyzeky tsimaha iwaze
Deus isapyrēnikia ty ibo nitsasoko. Abaka atahi
mybo nyny mykara.

4

¹ Makuskyry iykpykbyize batu ihyrinomyry.
Batu inamyky. Puētsik pyk myze taypykze
iwaze tisokpykziurēta. Tsinamyrēta. Iykpyk
byizeka maku tarabaja batu okyrysaro wata,
tahawatu zipehakanaha. Utsa kytsa harere bo
yh̃ mynakara. ² Mytaypykze ihyrinomyrytsa
zihyrinomyrykynaha. Amakata inamy perykytsa.
Asakta ihumo simypokzitsiukrētsa. Iwa isopyk.
Kyze izo tihi:

— Aba katse itaypyk niy abaka batu zipokzitsi-
naha — niy.

³ Iwata katsa deustsabyitsa harere humo yh̃
tsikykaranaha. Sipokso mpybyrētsa. Kyze Deus
harere ty humo tsiwabyziunaha. ⁴ Kyze nawa
zuruze Deus botu ziwatawy Deus tatse mybarawy
ezektsa bo zipehahik. Atahi mybarawy eze
nipuruk mywata niyzik. Mybarawy ezektatsa
ije niyzik. Taypykykze Moises harere ibyky bo
yh̃ ziknakara. ⁵ Iwaze myzubaha bo Deus bo
mymyoktyhyryk. Katsakta Moises harere ibyky
bo yh̃ tsimyzihikiknaha katsa kino mymyokty-
hyryk. Mysapyzeky nihyrikosokda iwatahi mys-
apybyitsa tsikykaranaha Deus nimyokzohik iwat-
sahi ihyrytsa tsikyziknaha.

⁶ Iwaze Deus tse Sesus tazo hyrikoso mybo zipeha, mytuk tawahi mynapykyryk. Ata humo zuba katsa Deus bo mopamykysoikik:

— O myzo ikia humo ka mymypokzitsiarēta —
tsimaha.

⁷ Iwa Deus niy. Tapara ikiahatsa nawaha ty batu isapy tsikykaranaha. Ahasopyksapyhu ja. Abaka Deus hyrytsa tsimoziknaha, ihyrytsa tuze isapyrēnikia ty botu nitsaso ahabo nyny my.

Pauro Karatas ezektsa humo paikpa mytsaty ziknakara.

⁸ Tubabatu Deus harere bo batu hỹ tsikykaranaha ahaspirikpobyitsa tsikykaranaha iwaze deustsabyitsa hyrikoso sapybara harere bo zuba yhỹ tsikykaranaha. ⁹ Abaka meky watu. Deus humo ahahyrinymyrētsa. Deus hiba zahany, iwatuze hawa skaraba deustsabyitsa harere bo yhỹ tsimykaranahazo. Siharere humo ahabyitsa tu ana humo hi tsimyzihikikzonaha.

¹⁰ Ikiahatsa hawaze ja, byzoje pirahanahaze niytyk tseheze iwa ana soho ty pykyhytu tsiwabytoktononaha. ¹¹ Hawa tsimykaranaha paikpa mytsaty tsimykaranaha. Iwaze kapetu kasopyk:

— Nawa ha ty Sesus harere iksihyrinymyryky batu ja — mykara.

¹² — O katukytsa! Ahabo myzapykyky. Tubabatu Moises harere ty pykyhytu yhỹ ikykara. Kyze meky watu ikyzik. Ahawatu ikyzik. Abaka ikiahatsa Moises harere bo yhỹ tsimyzihikikzonaha iwatsahi Deus okzeka ahamysapyrētsa tsimoziknaha mytsaty ahabyitsa tsimykaranaha. Tsipimyikinaha zeka ba kahumo zikaha — my. ¹³ Ahaspiriktsokda byihuja

tapara ahabo iknakozoreze kamyitsapyrêta
ikykara iwatatu Deus harere ahabo iktsasoko.
¹⁴ Kamyitsapyre tuze kapokso batu ahasikpyby.
Kaharere humo tsiwabytoktonaha. Bijoikpe
iknykta Deus tsumuêhĩtsa Sesus Kiristu watihi
ahabo my zeka ja hawa siharere tsipiwabynaha
iwa kaharere tsiwabykynaha. Kahumo ka
tsamyharerewabyrêtsa hỹ. ¹⁵ Ahakurêtsa tsikaha.
Kahumo tsimypokzitsirêtsa hỹ. Ahahyriziktsa
kabo tsiksibobokyzykynaha. Hawa ha ty ahabo
ipokzitsia ty kabo tsinyny tsihikiknaha. ¹⁶ Utakta
Deus harere baba humo ahabo iktsaso ana humo
hi ja ahakyriukrêtsa tsimykaranaha.

¹⁷ Asaktas Deus soho ty mybarapetu
mykaranaha siharere baba zuba tsiwabyz-
iukunaha. Ahahumo sizokdirêtsa. Ahaokzeka
wasanitsa watsa mynapykyryknaha iwa
zekaharere bo batu hỹ tsimaha, ana hi
mozihikiknaha. Iwaze siharere bo zuba
yhỹ tsimykaranaha mytsaty mykaranaha.
¹⁸ Aparakbaha ahaokzeka simysapyrêtsa
mahaze pahasapywykynaha zeka wasani myhỹ.
Ahatukbyitsa tuze pahasapywykynaha zeka
wasani my.

¹⁹ — O katukytsa ahahumo kamypokzitsiarêta.
Utakta wytyk wata. Atywatatsa tabykyhy
pepurukze tsimyitsapyrêtatsa! Ikiahatsa
Kiristu harere tsikaeni zuba ahahyrinymyrêtsa
iwatahi ahatsyhyryze sinini mykara. Hawa
wytyk ibykyhy humo tsimyitsapyrêtatsa
wata ahatsyhyryze sinini mykara. Ikiahatsa
Sesus tuktsa babatsa tsimoziknaha ana
humo hi ahatsyhyryze sinini mykara. ²⁰ O

katukytsa ahahumo kahyrizikbarêta. Ahabo tsimypamykyso tsihikiknaha. Batu zik utakta nokponi mynapykyryk. Kaharere humo pahatsumuêhĩ tsihikik. Ahasoho bo paikpa mytsaty mykara — my.

Deus harere wytykyryk petokorok waza my. Sara Aka niwatihi.

²¹ Aty zeka:

— Utakta Moises harere ibyky bo yhỹ mozihihik iwatahi Deus okzeka kamysapyrêta mozik — my. Ikiape my:

— O Moises harere ibyky tsiwabzyiuku — my. ²² Tubabatu Abarão hyrytsa petoktsa niy. Taparaktsa tsumuêhĩtsa Aka inarokotatsa atatsa humo estuba zuba nihyrytsa iwaze itse nipuruk. Bykyze ioke babatatsa Sara inarokotatsa humo niwatihi estuba zuba nihyrytsa iwaze itse nipuruk. ²³ Iwaze itse taparakta ije sitsumuêhĩtsa niy. Atahi nipurukze siza siza byiki hyrytsa wa tihi niy. Usta itse iykpykyhyzytykta batu. Deus harere hi nitsaso atsatu wasani niy. Abarão Sara ahatsa nipuruk sitsaikbatsa tu Deus harere humo zuba itse iykpykyhyzytykta.

²⁴⁻²⁵ Iwa piwataha iwaze pahahyrinymyry. Wytykyryk petokokzahaza Deus harere petok zuba waha. Tapara Deus harere Moises bo nitsasoko atahi Deus tyryktsa bo nitsasoko. Anaharere wytyk sitsumuêhĩtsa watatsa my. Bykyze Deus harere Sesus soho nitsasoko asahi ihumo sispirikporêtsa Deus tyryktsa moziknaha. Usa harere wytyk ioke babatatsa watatsa my.

Asiza harere wytykyryk petokokzahaza soho humo pahatsumuēhĩ.

Moises iwatahaha soho ty mykara. Anaka hara bijobonita ikny inasikze anaharere aparakbaha bo nitsaso. Aparakbaha Sudeutsa hara bijobonikiha Sinija inarokoha mykaranaha. Aparakbaha Arabija ezektsa ana hara bijoboniki ha Aka inarokoha mykaranaha. Ana hara bijobonikiha atatsa watatsa atatsa katsa sitsumuēhĩtsa niy my. Iwatatsahi itsekokatsa batu ziksibetesanaha. Serusarēhe soho bo mytsaty ziknakaranaha. Asahi Moises harere ibyky humo zuba hỹ mykaranaha. Asaktsa Sesus Kiristu harere bo batu h̃y zikaha. Iwatsahi asahi Moises iwatahaha bo zuba hỹ mykaranaha sitsumuēhĩtsa tsekokatsa watsa maha.

²⁶ Katsaktsa Deus harere bo hỹ tsimykaranaha iwaze ihumo myspirikporētsa tsimoziknaha. Iwatsahi Deus okzeka mysapyrētsa tsimoziknaha Serusarēhe myjewa. Usa Serusarēhe ezytyk bijoikpe ikny mynasik anahi myjewa. Atatsa itsekokatsa Moises iwatahaha soho tsikaeni zuba mytsaty mykaranaha. Sesus harere bo zuba hỹ mynakaranaha. ²⁷ Deus watahaha botu hi:

— O wytykyryk ikiahaka ahabykyhybyiza ahakurēza!

Ikiahaka ahabykyhybyiza hi ba itsapyriziyyk ahakurēza!

Ikiahaka ahahyrytsa tsimysiubaranaha.

Ipytsakatatsa ihyrytsa sizubarētsa ikiahaka ahapyitsabyiza waza tsimoziknaha,

asiza hi simyiwyhyza iwazatu ikiahaka ahhyrytsa tsimysiubaranaha.

Iwa Deus watahaha botu nitsasoko.

²⁸ Iwatahi katukytsa Deus hyrytsa tsimoziknaha. Sesus harere bo hyỹ tsimykaranaha iwatsahi ihumo ahaspirikporẽtsa iwatsahi Deus hyrytsa tsimoziknaha. Tubabatu Isake Abarão tse nipuruk, Deus harere humo zuba nipuruk. Abarão tse babata. Atsawatu ikiahatsa Deus hyrytsa tsimoziknaha. Sesus harere bo zuba hyỹ tsimykaranaha iwatsahi ahaspirikporẽtsa tsimoziknaha. Ahaspirikporẽtsa ziky Deus hyrytsa tsimoziknaha.

²⁹ Tubabatu Aka sitsumuẽhĩtsa tse Abarão ioke babatatsa Sara tse nizukyryky. Abaka atsatu mykaranaha. Asaktsa Moises harere bo hyỹ mykaranaha asahi Sesus tuktsa mysisukyrikiknaha. Aparakbaha Sesus harere bo hyỹ mykaranaha Deus hyrikoso situk mynapykyryk asa hi mysisukyrykynaha. ³⁰ Deus watahaha hi:

— Sitsumuẽhĩtsa tse humo kino mysiksiwyhik! Abarão oke babatatsa tse zuba tazo namy ty nyny mykara — iwa taparaktsa ziwatahakanaha.

³¹ Iwaze katukytsa katsa batu tsumuẽhĩtsa tsekokatsa watsa tsimaha. Moises harere ibyky humo ka ba hỹ zikaha. Katsaktsa ioke babatatsa tse watsa tsimaha. Sesus harere bo hyỹ tsimykaranaha iwaze ihumo myspirikporẽtsa iwatsahi Deus hyrytsa babatsa tsimoziknaha.

5

Aty sopyk humo sa tsimaha.

¹ Kiristu humo mysapyrẽtsa iwaze taparaktsa harere bo batu mysopyk. Iwaze Moises

harere bo zuba batu mytsatyziu tsimaha. Kiristu mymybetesaka zeka ituk mywahi tsimyzurukunaktsa! Kiristu zikwy mytuk mynapykyryk iwatsahi hawa tsimyzurukunaha wasani tsimykaranaha. Iwa tsimypykyryknahaze usts akytsa ahabo motsasonaha zeka:

— O taparaktsa sopykw ty tsimaha iwatsahi Deus okzeka ahamysapyrëtsa tsimoziknaha. Siharere bo yhỹ tsimaha! — mybarapetu mykaranaha. Siharere bo batu waby zikaha. Sitsumuëhĩtsitsa watsa batu tsimozikzonaha!

² Wabyziutaha! Uta Pauro ahape my:

— Ahanury ty myzyk myzyk byitahaktsa iwatsahi Deus okzeka ahamysapyrëtsa tsimoziknaha mytsaty ahabyitsa nikaranaha. Kytsa iwa maha zeka Kiristu ahasapyzaky nihyrikosokdaze batu mysapy. Batu zahatsumuëhĩ. ³ Kaharere ty ahape myzo: “Aty zeka Moises harere ibyky humo tanury ty pizyzykik atakta Moises harere ibyky tsizubarëna bo hỹ mykara. Batu estuba harere zuba, tsizubarëna mykara ziky”.

⁴ Ikiahatsa Moises harere ibyky bo hỹ tsimaha zeka iwatsahi Deus okzeka ahamysapyrëtsa tsimoziknaha mytsaty ahabyitsa nikaranaha, iwaze Kiristu metutu tsimypykyryknaha. Hawa tsimykaranaha humo batu pahasapywy batu ziky. Ikiahatsa tsipahanury zyzykiknaha zeka Deus okzeka batu ahamysapy Deus ba zahasapywyky.

⁵ Katsaktsa Deus okzeka mysapyrëtsa Sesus harere bo hỹ tsimykaranaha ihumo mspihikrëtsa. Deus hyrikoso mytuk mynapykyryk ana hi taperyky. Myakubyrisorokrëtsa tuze iwaze

Deus mype tihi: “O ikiahatsa ahamysapyrëtsa Sesus humo ahaspihikrëtsa iharere bo hyÿ tsimykaranaha” — mykara.

Ana harere hi tsipiperykynaha hÿ. Myspirikporëtsa tu Deus zikwy humo anaharere hi ihyrikoso humo taperyky. ⁶ Iwatsahi Sesus Kiristu harere bo zuba hyÿ tsimykaranaha. Aty taty piak zyk zeka, usta taty piak zyk byizeka astsatu maha. Deus okzeka petoktsa harapewatu maha. Katsaktsa Sesus Kiristu harere bo hyÿ tsimykaranaha ihumo myspirikporëtsa tsimoziknaha iwatsahi tyharape pokzitsikinaha iwaze Deus mymysapywyky.

⁷ Tapara ikiahatsa Sesus harere bo hyÿ tsimykaranaha iwaze ihumo tsisapybakanaha. Amo skaraba Sesus harere humo batu ahakparawy. Mektsa harere zuba tsiwabzyiukunaha iwatsahi tsimyiknaha. Sesus harere bo hyÿzo tahaktsa. ⁸ Deus zahawatawy iwatahi mektsa harere ty ka batu ahabo tyso. ⁹ Ana kino atsikara pytowy waha. Hawa katsaktsa pytowy tsikaeni zuba tiriko tuk ikykywy bykyze nawerekbaik. Pytowy na waha estuba zubata mektsa harere bo yhÿ my zeka ustsas mysimiwybaka. ¹⁰ Utakta ikiahatsa humo kahyrinymyrëta hÿ. Katsaktsa Sesus harere bo hyÿ tsimykaranaha iwatsahi ihumo myspirikporëtsa kawata mytsaty tsimykaranaha. Hawa mytsaty tsimykaranaha kawatsa atsatu mytsaty tsimykaranaha. Atakta imysapybara ty zahahyrinymyryky iwatahi zahamiwyky sinini mykara. Deus hi ipe my:

— O ikia batu amysapy tsimy, hawa batu sapy kahyrytsa nisihyrinymyry — my.

Iwa Deus isoho humo mykara.

¹¹ — O katukytsa kahumo mytsatzyiutahaktsa! Amo skaraba kytsa ziksukyrykynaha. Ahabo zeka ahanury ty tysizyzyknahaktsa iwatsahi Deus okzeka ahamysapyrëtsa tsimoziknaha mykara iwa zeka ba zik sukyrykynaha. Iwa batu tyso. Kaharere Kiristu soho ikykara ihumo ahaspirikporëtsa iwatsahi Deus okzeka ahamysapyrëtsa tsimoziknaha anahumo hi tahakyrikinaha. Hawa Sesus Kiristu ahasapyzeken iharapatawyhyta humo zihyrizikiknaha, iwaze zibezenaha, anahumo hi katsa Deus okzeka mysapyrëtsa anaharere humo hi tahakyrityikiknaha. ¹² Asaktsa ahape ahanury tsizyzyknahaktsa iwatsahi Deus okzeka ahamysapyrëtsa tsimoziknaha. Asaktsa sokorotsapu siakparawy, asaktsa tahapiakzyzykbaiknaha iwatsahi tahamyitsapyrikiknaha ana humo kino mozhikik — my.

¹³ — O katukytsa Deus humo ahamysapyrëtsa. Iwatsahi ahaspirikporëtsa tuze batu tyso. “O abaka hawa katsa tsimyzihikiknaha atsatu tsimykaranaha. Mysapybyitsatu tsimykaranaha” — Iwa batu tyso. Ahaspirikporëtsa tyharape pokzitsikinahaktsa! ¹⁴ Moises harere ibyky taparaktsa mydiritsa kino niwatihi sisopykwy tu maha. Siwatahaha tihi:

— Aotutsa pauksitsa humo tynasipokzitsikinaha, ahumo tu tsinakaranaha wa tihi tysipokzitsiki — niy. ¹⁵ Katukytsa pykyhytutaha! Siraratsa sirerëtsa watsa asahi nahapeboroikiknaha iwa ahasopyk zeka hawatsa tsimykaranaha usts ba

ziksipokzi tsihikik. Ikiahatsa ahaharerewabymy-barētsa iwatsahi ustsā ba mysipokzitsi iwaze sir-aratsa watsa ahasopyk.

Deus hyrikoso mytuk mynapykyrykze mysapyrētsa tsimoziknaha.

¹⁶ Kaharere bo wabyziutaha! Deus hyrikoso ahatuk mynapykyryk zeka iharere bo zuba hỹ tsimykaranaha. Iharere tawaby zeka ana hi Deus mozihikik. Hawaha tsimyzihikiknaha bo ka mytsaty mytsaty byitaha. ¹⁷ Hawa katsa tsimyzihikiknaha Deus hyrikoso batu h̃y niy. Hawa Deus hyrikoso mozihikik anatyhi katsa batu h̃y tsikaha. Deus hyrikoso harere bo zuba yh̃y tsimykaranaha zeka hawa tsimyzihikiknaha batu zikaha. ¹⁸ Deus hyrikoso harere bo hỹy tsimykaranaha zeka Moises harere ibyky tsizubarēna bo batu mytsaty tsimykaranaha. Anaharere humo hi tsimykaranaha zeka Deus okzeka batu mysapy iwatsahi Moises harere ibyky bo batu h̃y ahasopyk.

¹⁹ Hawa katsa tsimykaranaha ana humo hi mysoho baba tsipiwatawynaha iwatsahi aparakbaha myhumo sihyrinymyrētsa. Iwa tsimykaranaha. Asaktsa Deus harere bo batu h̃y zikaha iwa mozurukunaha. Asaktsa usta oke bo hua mynakaranaha. Usta maku piwohiknaha. Kytsa wytykyryk mysipyriyikiknaha mowakyrivy waza sisopyk. ²⁰⁻²¹ Kytsa deustsabyitsa bo napamykysoikiknaha. Asaktsa tahanamy zuba motsasoko:

— O atakta mydeus hi — mybarapetu mykaranaha. Ustsā kytsa namysukyrykynaha.

Sisukyrytsitsa tu naharape huzeduikiknaha. Siokanirētsa simyiwyhytsa tu mynasisuknikinaha. Sizokdirētsa. Sihyrizikzorētsa. Myharapepehaikiknaha iwatsahi metutu mopapahabakanaha. Mysiaknikinaha. Tsōsī humo pypykbeze mykaranaha. Utsa humo myharape huzezukunaha. Asaktsa iwa sisopyk batu Deus tyryktsa zikyriknaha. Deus harere humo batu siakparawy.

²²⁻²³ Deus hyrikoso mynamykse zeka mytuk mynapykyryk ihumo meky watu tsimoziknaha. Deus hyrikoso humo ustsā aparakbaha bo tyharape pokzitsikinaha. Atahi mymykusukniwyky iwatsahi mykurētsa tsimykaranaha. Ihumo batu paikpa mytsaty tsimykaranaha. Mysopykziurētsa. Mykubyrisorokrētsa. Aparakbaha tuk ba ziksimyiki myhyrizikporētsa mysapyrētsa tsimaha. Mysakikihikrētsa. Batu tyso katsa zubatsa ty wasani tsimykaranaha. Mypetu mysopyk iwatsahi mysapybara ty batu hỹ tsimaha. Deus mysoho tihi:

— O ahamysapyrētsa tsimoziknaha — my. Mysapyrētsa tu zeka batu aty tohi mype ziky:

— O batu ahamysapy — maha. Iwa batu tyso zikaha. ²⁴ Katsaktsa Sesus tuktsa tsimaha. Ihumo myspirikporētsa hawa ha ty tsimyzihikiknaha ana kino batu myty peha my. Hawa batu mysapy ana humo kino batu hỹ tsimaha. ²⁵ Deus hyrikoso mytuk mynapykyryk zeka ata humo kino meky watu tsimoziknaha. Atahi mypehatsa mozik. Iwatsahi izikwy humo tsimyzurukunaha. Atazuba namypehaka iwatsahi iharere bo zuba ma ty-

nakaranahaktsa! Hawa mymykzoze iwa tsimyzurukunaha. ²⁶ Batu tyso:

— O katsa zuba wasani tsimaha. Iwa batu tyso. Aparakbaha tuk ahasakpare byihujataha! Utsa aparakbaha simysapyrëtsa humo maha zeka ahazokdi byihujataha! kytsa — my.

6

Tyharape tsumuëhñahaktsa.

¹ — O katukytsa aty zeka imysapybyikia ty my zeka ikiahatsaktsa Deus hyrikoso myzahakse ibo tsitsumuëhñaha — ipe tsimaha:

— O katsy amysapybyikia ty tsikapybywykta! — tsimaha. Ahaharereziu tuktu ja taha! Pykyhytutaha. Atsawatu tsimyzihikiknaha zeka ahamysapybyitsa tsimykaranaha. ² Aty zeka iakubyikita bo iktsa tsimaha zeka ibo tsakusuknikinaha. Tyhapetsumuëhñahaktsa kytsa! Iwaze anaharere humo Kiristu zahahyrinymyryky hyÿ tsimykaranaha. ³ Aty tapetu isopyk zeka:

— O utakta abazubata — mytsaty ahabyita mykara, myhyrizikwybyita tu tapetu isopyk mybarapetu mykara. ⁴ Hawa tsimykara ana soho bohi mytsatyziu tsimykara. Tsipisapyky zeka tsakurëtakta! Apetu asopyk. — Wasani mykara iwatahi kakurëta — my. Hawa ustsas mykaranaha sibo batu iktsa tsimy. Batu tyso:

— Utsaktsa batu wasani mykaranaha iwatahi utakta wasani mynakara — my. Iwa batu tyso.

⁵ Ahazikara byihuja kytsa! Ahahyrikzitsokzawy

humo Deus ahabo nyny niy iwatsahi tsikahasopy-kziubanaahaktsa!

⁶ Aty Deus harere ty pahahyrinymyryky tahanamy ty ibo nyny tahaktsa! Ahanamy isapyrēnikia ty ibo tsipibiaknaha.

⁷ Deus harere ty katy myi myiwy byitaha! Tsimytsasonaha zeka: — O uta kamysapyrēta my zeka Deus piksapywyky hỹ — tsimy. Iwa batu tyso tapetu zuba isopyk mybarapetu tsimy. Deus ta ba zik mospihikbata, atahi tsihyrinymyrēta hỹ. Hawa tsimykaranaha humo tsihyrinymyrēta.

⁸ Aty zeka amytsa mysiparikik zeka astsatu zuba pusukuknaha. Batu mektsatu zikaha. Katsa niwatihi siriktsa mysiparikik nahatsa watsa tsimaha. Hawa ha ty mysapybyitsa tsimykaranaha zeka Deus tuk batu mywahi tsimynapykyryknaha. Katsaktsa Deus hyrikoso harere bo hyỹ tsimykaranaha Deus tuk mywahi tsimynapykyryknaha.

⁹ Iwaze tysapywykynahaktsa! Ahazikarabyitsa tu tsipisapywykynaha iwaze Deus isapyrēnikia ty ahabo nyny mykara. Iwatsahi mykurētsa tsimaha. ¹⁰ Iwatsahi tyharapetsumuēhĩkĩnahaktsa kytsa! Asaktsa mytukytsa Sesus tuktsa asa bo hi tsipisapywykynaha hỹ.

Abaka mopykykze katukytsa bo mytsaty mykara.

¹¹ Abaka kamywatahawy ty okok iky. Iwahahi ipamabara ty piwatahaka. ¹² Kytsa pahahyrinymyrykynaha asa hi:

— O ahanury ty tsizyzykiknahaktsa! iwa tsimaha zeka Deus okzeka ahamysapyrëtsa tsi-moziknaha — mybarapetu mykaranaha. Iwa motsasokonaha kytsa harere humo zuba. Iwaze sizubarëtsa nisisokonaha:

— O simysapyrëtsa mykaranaha. Hawa ha ty mysihyrinymyryky wasani my, Sudeutsa sopy-kwy bo yhÿ mykaranaha — maha. Iwa aparak-baha sisoho motsasokonaha anawahi mozihi-kiknaha. Sesus iharapatawy humo mysapyz-eky nihyrikosokda motsasokonaha zeka aparakbaha mysisukyrikiknaha ana pokso sipybyrëtsa iwatsahi ahanury tsizyzykiknahaktsa mykaranaha.

¹³ Asahi ahanury pizyzyk tsihi-kiknaha iwatsahi Deus okzeka ahamysapyrëtsa tsi-moziknaha baija mytsaty ahabyitsa mykaranaha, asahi Moises harere tsizubarëna bo batu yhÿ mykaranaha. Aparakbaha mozihi-kiknaha tihi:

— O Karatas ezektsa sinury zizyzykiknaha my-harere humo abaka Sudeutsa sopykwy bo hyÿ mykaranaha — iwa mozihi-kiknaha hÿ.

¹⁴ Niwazubakta! Utakta Sesus Kiristu soho zuba motsasoko. Hawa mysapyz-eky iharapatawyhyta humo zihyrikiknaha iwa zibezena. Iwatsahi katsaktsa Deus okzeka mysapyrëtsa tsi-moziknaha. Ana humo zuba motsaso tsihi-kik. Hawa ha ty aparakbaha bo ipokzitsianikia ty mytsaty mykaranaha kahumo ka hana bo ja batu waby. Anasoho ty hi batu hÿ my. Sisopykwy humo batu hÿ my. ¹⁵ Iwatsahi myty piak zyk zeka Deus mysoho humo ba mytsaty ziky. Myty piak zyk ahabyizeka mysoho humo ba mytsaty ziky. Sesus Kiristu harere bo hyÿ tsimykaranaha ana

humo zuba mytsaty mykara. Katsaktsa mysapyrētsa tsimoziknaha Sesus humo ana humo hi zuba wasani my. ¹⁶ Ikiahatsaktsa kaharere bo yh̃y tsimykaranaha. Deus bo mopamykysokoze ahasoho tihi:

— O Deus myzo Sesus tuktsa Karatas ezektsa tysisapywyky. Aharere bo hỹy mykaranaha iwatsahi ahumo sispirikporētsa moziknaha. Sispirikporētsa tu ba paikpa mytsaty zikaha tysiakusukniki tsimy — my. Ana hi Sesus tuktsa sizubarētsa mozihikik.

¹⁷ Abaka mopykyk. Batu aty tohi zikykni. Deus wasania ty iktsasoziuku. Utakta Sesus harere humo aparakbaha ziksukyrykynaha. Kapuni-hikrēta tu Sesus harere iktsasokoze sinini ikykara. Sesus pokzi sinini ikykara kanury humo iwatahawy, ana bo hi iktsa tsimykaranaha.

Deus pahasapywyky.

¹⁸ O katukytsa ahatsyhyryze Deus bo mopamykysoko:

— O Deus mypehakatsa Sesus Kiristu Karatas ezektsa tysisapywyky — my. Iwa mozihikik h̃y. Niwazuba. Deba.

Pauro

Deus Harere Aibaky Sesus mymyspirikpoko naha

New Testament in Rikbaktsa (BR:rkb:Rikbaktsa)

copyright © 2011 Wycliffe Bible Translators, Inc.

Language: Rikbaktsa

Translation by: Wycliffe Bible Translators, Inc.

Rikbaktsa [rkb], Brazil

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Rikbaktsa

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

2f0260ea-5969-5180-9ac5-183d63a989f1